



FOTO O. ITEM

## Gurtner è sceptic: «Organisaziun è memia gronda»

■ (rtr) Reto Gurtner è sceptic envers ils gieus olympics sulet en il Grischun. L'organisaziun saja memia gronda per il Grischun, ha ditg il schef da l'Arena Alva. El fiss persunter da far gieus olympics en il chantun ensemen cun ina citad sco Turitg.

Tenor *Reto Gurtner* avessi quai gronds avantatgs. Per exempel pudessan tuttas medias esser a Turitg/Leutscherbach. «La è pli u main l'entira infrastruttura avant maun», di Gurtner. «Da l'autra vart avessan ins er avunda letgs per tut quellas bun 10 000 personas da las medias giu Turitg.» Els vegnissan lura mintgamai mo per las concorrenzas si en il Grischun.

### Concentrà memia fitg

Plinavant crititgescha Gurtner era che la candidatura saja concentrada memia fitg sin ils dus lieus Tavau e San Murezzan enstagl da duvrar las infrastrukturas existentas en autras regiuns. Cun plazzar tut las disciplinas en sulet quels dus lieus n'haja quai betg lieu per tut ils aspectaturs, uschia Reto Gurtner. Per l'aspectatur na stoppian las differentas disciplinas betg esser ina sper l'autra. L'aspectatur che guardia las cursas da skis alpin na saja betg il medem aspectatur che guardia era curling. Avessan ils responsabels dals gieus olympics repartì las disciplinas sin l'entir chantun Grischun pudess era l'entir chantun profitar.

Tenor Reto Gurtner fissi era pli attractiv da realisar las disciplinas sin glatsch, sin glatsch ordadora e betg en ina halla. Quai dess maletgs fenomenals, manegia Reto Gurtner. La cuntrada dal Grischuna na vendia il Grischun numnadamain betg cun maletgs or da hallas.

### Gurtner na crai betg vid in gea

El na saja betg cunter gieus olympics, ma quels stoppian vegnir fatgs en ina moda e maniera durabla. Sch'ins possa meglierar l'infrastruttura gia existenta ed era la duvrar sunter ils gieus saja quai bun, uschiglio betg. Cunquai che betg l'entir chantun Grischun saja involvè na crai Reto Gurtner betg ch'il suveran ditgia gea ils 3 da mars.